

詩  
氏  
族  
考

詩氏族考卷第五

嘉興 李超孫 輯

大雅

文王

文王

古今人表列上上作文王周氏

宋書符瑞志季歷之妃曰太任夢長人感已浚于豕牢而生昌是爲周文王龍顏虎肩身長十尺胸有四乳白虎通文王四乳是謂至仁天下所歸百姓所親

春秋元命苞文王四乳是謂含良蓋法酒旗布恩舒明

文王龍顏柔肩望羊

姬昌蒼帝之精位在房心

晉語文王在母不憂在傅不勤處師勿煩事王不怒及

其卽位也詢于八虞而咨于二虢度于閼天而謀于南宮諏于蔡原而訪于辛尹重之以周召畢榮億甯百姓而柔和萬民

孔叢子子思曰殷王帝乙之時王季以九命作伯于西受圭瓚柅鬯之錫文王因之得專征伐

帝王世紀文王襲父爲西伯

易乾鑿度昌二十九年伐崇侯作靈臺

淮南子文王砥德修政三年而天下二分歸之紂聞而患之崇侯虎曰周伯昌行仁義而善謀太子發勇敢而不疑中子旦恭儉而知時若與之從則不堪其殃縱而赦之身必危亡冠雖弊必加于首及未成請圖之乃拘

文王于羗里

史記帝紂囚西伯于羗里閼天之徒患之乃求有莘氏美女驪戎之文馬有熊九駟他奇怪物因殷嬖臣費仲而獻之紂紂大說曰此一物足以釋西伯況其多乎乃赦西伯賜之弓矢斧鉞使西伯得征伐西伯乃獻洛西之地以請紂去除炮烙之刑紂許之

六韜商王拘周伯昌于羗里太公與散宜生以金千鎰求天下珍物以免君之罪于是得文馬駿身朱鬣目如黃金項下雞毛名曰雞斯之乘以獻商王

尙書大傳注散宜生文王四臣之一也呂尙有勇謀而爲將散宜生有文德而爲相

困學紀聞鸞熊爲周文王師著書二十二篇諸子之最先者

人表考文王名昌父王季母太任諡曰文

白虎通引諡法慈惠愛民

曰文呂氏春秋引諡法經緯天地曰文

追王爲王唐天授元年追尊爲始

祖文皇帝享國五十年年九十七都豐葬于畢

按尙書武成惟九年大統未集孔安國云言諸侯歸之九年而卒故大業未就劉歆以爲文王受命九年而崩正義以文王九十七而終終時受命九年受命之元年年八十九其卽諸侯之位已四十二年矣故帝王世紀云文王卽位四十二年歲在鶉火于是更爲受命之元年引周書稱文王受命九年惟暮之春

在鎬召太子發作文傳九年猶召太子明其七年未崩故諸儒皆以爲九年而崩尙書大傳文王受命一年斷虞芮之訟二年伐邠三年伐密須四年伐犬夷五年伐耆六年伐崇七年而崩史記周本紀西伯陰行善諸侯皆來決平虞芮俱讓諸侯聞之曰西伯蓋受命之君明年伐犬戎明年伐密須明年敗耆國明年伐邠明年伐崇而作豐邑明年西伯崩雖與書傳先後不次要皆以文王受命七年而崩蓋自姜里之出至是九年矣緯書俱以文王伐崇在六年始稱王如乾鑿度布王號之下注云受命後五年乃爲改號是鄭意亦以六年始王也史遷以受命之年稱王皇

甫謚亦云受命元年始稱王馬驕謂詩書所稱文王皆後世追述之辭武王追王三王在母野既事之後豈有率畔事殷終守臣節之文王而及身稱王乎歐陽公泰誓論極言受命改元之妄

大明

摯仲氏任

古今人表列上中作大任

毛傳摯國任姓之中女也

鄭箋摯國中女曰大任

正義曰任姓仲氏故知摯爲國以下言大任婦人稱姓故知任爲姓仲者中也故言之中女此言仲任下言大任者此本其未嫁故詳言其國及姓字下言已嫁以常

稱言之禮婦人從夫之諡故頌稱大妣爲文母大任非諡也以其尊加于婦故謂之大姜大任大妣皆稱大明皆尊而稱之唯武王之妻左傳謂之邑姜不稱大蓋避大姜故也周本紀云大王曰我世當有興者其在昌乎則王季未爲世子而生昌矣此則從後而言若王季爲君之時也

國語摯疇之國由太任注摯疇二國奚仲仲虺之後太任之家

列女傳太任者摯任氏中女也王季娶爲妃太任之性端一誠莊惟德之行及其有娠目不視惡色耳不聽淫聲口不出惡言文王生而明聖太任教之以一而識百



詩氏族考卷第五

四  
附下  
禮  
本

君子謂太任爲能胎教

世本古義太任王季之妃皇王大紀云太任有賢德目不視窈色耳不聽淫聲口不出惡言容貌恭肅齋如也以來嫁之年生子昌卽文王也

人表考國語注以摯爲仲虺後唐書任氏薛氏世系表路史謂仲虺後祖已七世孫成徙封于摯任潛夫論作姪

武王

古今人表列上上

史記西伯崩太子發立是爲武王

白虎通武王望羊是謂攝揚旰日陳兵天下富昌

春秋元命苞武王齟齬是謂剛強取象參房逐命誅害

以從天心

新書昔周文王使太公望傅太子發嗜鮑魚而太公弗與曰禮鮑魚不登于俎豈有非禮而可以養太子哉帝王世紀武王妃太公之女曰邑姜修教于內

史記武王卽位太公望爲師周公旦爲輔召公畢公之徒左右王師修文王緒業九年東觀兵盟津爲文王木主載車中遂興師渡河中流白魚躍入王舟中旣渡有火自上復于下至王屋流爲烏其色赤其聲魄是時諸侯不期而會者八百諸侯皆曰紂可伐矣武王曰女未知天命未可也乃還師歸居二年聞紂昏亂暴虐滋甚于是徧告諸侯率戎車三百乘虎賁三千人甲士四萬

五千人以東伐紂十一年十二月戊午師畢渡盟津諸侯咸會作太誓二月甲子昧爽武王朝至商郊牧野乃誓誓已諸侯兵會者車四千乘紂亦發兵七十萬人距武王王使師尚父致師紂師皆倒兵以戰武王馳之紂兵皆崩紂走反入登于鹿臺之上蒙衣其珠玉自燔于火而死

論衡師尚父爲周司馬將師伐紂到孟津之上杖鉞把旄號其衆曰倉兕倉兕者水中之獸也善覆人船因神以化欲令急渡武王得白魚喉下文曰以予發

六韜武王問散宜生曰伐紂吉乎曰不吉將行雨輶車太公曰是非子所知也祖行之日雨輶重車是洗濯甲

兵也

八表考武王名發文王子母大妣白虎通剛強理直曰  
武史周紀正義作克定禍亂曰武爲西伯十一年爲王  
六年年五十四

史本路

都鎬葬京兆長安鎬聚東杜中

按墨子云武王折紂而繫之赤環載之白旗以爲天  
下諸侯僂論衡謂紂就斬以鉞懸其首于太白金今  
注亦謂武王以黃鉞斬紂尸子又以武王親斫殷紂  
之頸手汚于血諸書俱言武王斬紂儒者多不信賈  
誼新書謂紂走還于寢廟之上身鬪而死據此則斬  
紂之說非也史記謂自燔而死說或可信至云武王  
至紂死所以黃鉞斬紂頭縣大白之旗此又史遷之

妄淮南子云紂拘于宣室而不反其過而悔不誅文  
王于羑里若然則紂猶不死而拘也說雖不同亦足  
以證斬紂之誣

又按馬驢云自文王有受命改元之誣說者遂謂武  
王嗣立不改元卽上接文王之年而泰誓稱十三年  
者畢喪伐紂也此皆妄說蓋泰誓所稱卽武王十三  
年也愚謂文王世子夢齡之言亦未可憑信雖在聖  
人豈能減已齡而益其子乎考史記周本紀載武王  
初得天下告周公旦曰維天不饗殷自發未生于今  
六十年是武王生于殷帝乙十一年庚辰逮卽位十  
三年克紂又七年而崩如本紀又云武王卽位九年

祭文王之墓于畢然後觀兵盟津而伯夷列傳復有父死不葬之說進退無據無惑俗儒邪說之紛紛也

師尙父

古今人表列上中

毛傳師太師也尙父可尙可父

鄭箋尙父呂望也尊稱焉佐武王爲上將

史記太公望呂尙者東海上人其先祖嘗爲四嶽佐禹平水土甚有功虞夏之際封于呂或封于申姓姜氏夏商時申呂或封枝庶子孫或爲庶人尙其苗裔也本姓姜氏從其封姓故曰呂尙

正義曰齊世家云太公望呂尙者西伯出獵得之曰吾太公望子久矣故號曰太公望載與俱歸立爲太師劉

向別錄曰師之尙之父之故曰師尙父泰誓注云文王于磻谿得呂尙號曰尙父尊之爲作此號如世家之文尙本是名號之曰望雒師謀云呂尙釣厓注尙名也又曰望公七年尙立變名注變名爲望蓋因所呼之號遂以爲名以其道可尊尙又取本名爲號也孫子兵法曰周之興也呂牙在殷則牙又是其名字也

六韜文王將田史編布卜曰田于渭陽將大得焉非龍非鬻非虎非羆兆得公侯天遺汝師以之佐昌施及三王文王曰兆致是乎史編對曰編之太祖史疇爲禹占得臯陶兆比于此文王乃齋三日田于渭陽卒見太公坐茅以漁乃載與俱歸立爲師

水經注礪谿中有茲泉泉水潭積自成淵渚東南隅有石室蓋太公所居也水流次平石釣處太公垂釣之所也其投竿踞餌兩膝遺跡猶存

說苑呂望年七十釣于渭渚三日三夜魚無食者上有農人謂望曰子姑復釣必細其綸芳其餌徐徐而投無令魚駭望如其言初得鮒次得鯉刺魚腹得書文曰呂望封于齊

鼎錄太公于渭水得玉璜鑄一鼎刻其文曰璜鼎

搜神記文王以太公爲灌壇令期年風不鳴條文王夢一婦人甚麗當道而哭問其故曰我泰山之女嫁東海婦欲歸灌壇令當道有德吾行必有大風疾雨是毀其



德也文王覺召太公問之是日果有疾雨暴風從太公  
邑外而過文王乃令太公爲大司馬

繹史博物志云西海神女嫁于東海神童按凡言神怪  
者多附會太公其來久矣

人表考尙父姓姜名望字子牙號太公又名涓易林曰  
姜望抱朴子曰姜公亦曰姜老河內汲人封于齊卒年  
百餘歲葬鎬京陪文武之墓唐上元元年尊爲武成王  
宋大中祥符元年加諡昭烈武成王

按文王之得太公其得之年歲經典各殊雒師謀注  
謂文王旣伐崇侯乃得呂尙于磻谿是伐崇之年得  
也書大傳謂散宜生南宮括閎夭三子相與學訟于

太公四子遂相見于姜里是被囚之年得也齊世家云西伯斷虞芮之訟而詩人稱西伯受命曰文王大作豐邑天下三分其二歸周者太公之謀計居多是斷虞芮之前得也皇甫謐則以爲未受命時已得太公孔疏以左傳稱呂伋爲王舅則武王之后太公女也文王受命六年武王已八十二矣不應此時方取王室且文王于今年得之明年卽崩以人情準之未應便爲武王取其女也此亦可疑

又按符子太公涓釣隱谿五十六年列仙傳以呂尙爲冀州人隱于南山釣于卜谿三年譙周古史考桓譚鹽鐵論俱云呂望屠牛于朝歌太公出處史遷已

不能定宜諸說之紛歧也

縣

古公亶父

古今人表別上中作大王亶父

毛傳古公豳公也古言久也亶父字或殷以名言質也鄭箋古公據文王本其祖也諸侯之臣稱君曰公

正義曰以在豳爲公故曰豳公言其年世久古後世稱前世曰古公猶云先王先公也太王追號爲王而稱公者本其生存之稱士冠禮爲冠者制字云伯某甫以周制論之甫必是字或殷以亶父爲名名終當諱而得言之者時質故也中候稷起注云亶父以字爲號則鄭意定以爲字不從或說也

詩集傳名物鈔案世本自公劉慶節皇僕差弗僞榆公  
非辟方高圉侯牟亞圉雲都太公組紺諸盤十有二世  
而生古公亶父自稷至亶父蓋二十餘世矣  
史記古公亶父復修后稷公劉之業積德行義國人皆  
戴之

吳越春秋古公杖策去邠踰梁山而處岐周曰彼君與  
我何異邠人父子兄弟相帥負老攜幼揭斧鉞而歸古  
公居三月成城郭一年成邑二年成都而民五倍其初  
書傳略說太王亶父杖策過梁山邑岐山周人束脩奔  
而從之者二千乘一歲而成三千戶之邑

琴苑要錄岐山操周太王之所作也曰翟人侵兮土地

言部方寸各錄三  
遷移邦邑適于岐山烝民不憂兮誰者知嗟嗟奈何兮  
子命遭斯

惠棟九經古義古公者故公也說文云古故也穀梁云  
踰年不卽位是有故公也猶言先王先公

人表考大王公祖子大淮南子作秦父韓詩作甫古公  
楚辭單稱古去邠邑岐其南有周原始改國曰周壽百  
二十

按世本太公組紺史記作公叔祖類世表作祖類皇  
甫謚云公祖一名組紺諸盤史記亦缺路史號爲太  
公司馬貞曰世本云太公組紺諸盤三代世表稱祖  
類凡四名史記旣缺而不全竟稱亞圉子公叔祖類

公叔祖類子古公直父孔疏乃謂祖紺卽諸盤太王父以諸盤爲太王父是也而以祖紺諸盤合爲一人則非矣

姜女

古今人表列上中

毛傳姜女太姜也

正義曰姜女太王之妃周本紀云太姜生季歷故知姜女是太姜也

列女傳太姜者有呂氏之女賢而有色太王娶以爲妃生太伯仲雍王季貞順率道靡有過失太王謀事遷徙必與太姜

周語曰皇妣太姜

言上放卷第三  
大明正義周語伶州鳩曰昔武王伐殷歲在鶉火月在天駟日在析木之津辰在斗柄星在天龍我姬氏出自天龍皇妣太姜之姪伯陸之後逢公之所憑神也天龍一名元枵齊之分野太姜之祖有逢伯陵者殷之諸侯封之齊地逢公之死其神憑焉我周出于姜姓爲外祖所佐也

世本古義姜女太王妃也號曰太姜韋昭云有逢伯陵之後也皇王大紀云竄父娶于齊有台氏女曰大姜美而賢列女傳有台作有呂

思齊

周姜

毛傳周姜大姜也

世本古義太姜太王之妃周自太王始遷故系姜于周

大妣

古今人表列上中

毛傳太妣文王之妃也太妣十子衆妾則宜百子

史記太妣文王正妃也

大明正義妣是其姓莘國長女

列女傳太妣者有藝妣氏之女仁而明道文王嘉之親  
迎于渭及入思媚太姜太任旦夕勤勞以進婦道生有  
十男長伯邑考次武王發次周公旦次管叔鮮次蔡叔  
度次曹叔振鐸次霍叔武次成叔處次康叔封次聃季  
載太妣教誨十子自少及長未嘗見邪辟之事卒成武



王周公之德

皇王大紀昌爲世子娶于有莘氏曰太姒太姒不妬忌而西伯有內行此德政所以流布而風化所以大興也汪師韓韓門綴學鄒氏忠允以太姒爲文王繼妃田閒詩學推明其說以爲大明之詩曰文王初載天作之合明爲文王卽位之初年文王年九十七享國五十年則四十七卽位若太姒年政及笄齒不相當大明又曰續女維莘續繼也明以莘女繼莘女也意必文王爲世子時所娶莘女是太姒之姊不祿無子中年再娶于莘而得太姒故曰覩天之妹其曰長子維行乃女子有行之行禮重嫡長珍重其女而尊稱之卽謂太姒居長亦可

安知太妣之姊非其伯叔之女乎

人表考太妣亦曰文母唐天授元年追尊爲文定皇后  
按長子維行余疑長子蓋指初娶莘女言行訓爲往  
必姊妹同嫁于周猶謂娣姪從之未定是不祿而卒也  
按鄭于天作之合箋云于文王適有所識則爲之生  
配謂生太妣疏申其說謂于文王有所識則不過二  
三歲大戴禮稱文王十三生伯邑考十五生武王發  
明太妣之小于文王纔一二歲耳若如鄭氏混言文  
王有所識而太妣始生則似大于太妣數歲矣以文  
王十三生伯邑考準之太妣不尙髫髻歟矣乎無是理  
也疏義自明

又按孫毓以嘉止定祥謂昏禮不稱主人母在則命之此時文王纔十三四孺子耳王季尙在豈得制定求昏之事其說似非無理然以文王是時爲十三四歲又與大戴不合

又按毛公云太姒十子此外尙有滕叔郤子雍豐侯毛叔鄭原伯畢公高郇伯皇甫謐并召公亦文王庶子其皆衆妾所生與

皇矣

大伯

古今人表列上中

史記古公有長子曰太伯次曰虞仲太姜生少子季厯季厯生昌有聖瑞古公曰我世當有興者其在昌乎長

子太伯虞仲知古公欲立季厯以傳昌乃亡如荆蠻文  
身斷髮以讓季厯 太伯之犇荆蠻自號勾吳荆蠻義  
之從而歸之千餘家立爲吳太伯

吳越春秋古公知昌聖欲傳國以及昌太伯仲雍望風  
知指古公病二人託名采藥于衡山遂之荆蠻古公卒  
太伯仲雍歸赴喪畢還荆蠻國民君而事之自號爲勾  
吳吳人問何像而爲勾吳太伯曰吾以伯長居國絕嗣  
者也其當有封者吳仲也故自號勾吳荆蠻義之從而  
歸之者千有餘家數年之間民人殷富遭殷之末世衰  
中國侯王數用兵恐及于荆蠻故太伯起城周三里二  
百步外郭三百餘里在西北隅名曰故吳人民皆耕田

其中

鄭氏論語注太王疾太伯因適吳越採藥太王沒而不返季厯爲喪主一讓也季厯赴之不來奔喪二讓也免喪之後遂斷髮文身三讓也

論衡太王薨太伯還王季避之太伯再讓王季不聽三讓曰吳越之俗斷髮文身吾刑餘之人不可爲宗廟社稷之主王季知不可權而受之

人表考太伯太王適子季厈之兄亦曰吳太伯文身斷髮以避季厈自號勾吳後武王追封爲吳伯葬吳郡無錫縣東皇山宋元符三年封至德侯

按史記謂古公長子太伯次虞仲太姜生少子季厈

則太伯乃庶長季歷爲嫡出矣若使太伯以避嫌而讓少弟豈可謂至德乎王伯厚云太伯虞仲辟季歷適荆蠻若有適庶不須相辟知其皆同母也

王季

古今人表列上中

史記古公卒季歷立是爲公季公季修古公遺道篤于行義諸侯順之

論衡大王以王季之可立易其名爲歷歷者適也

韓詩外傳太王賢昌而欲季爲後也太伯去之吳太王將死謂曰我死汝往讓兩兄彼卽不來汝有義而安太王薨季之吳告伯仲伯仲從季而歸羣臣欲伯之立季季又讓伯謂仲曰何以處之仲曰刑有所謂矣要于扶

微者可以立季季遂立而養文王文王果受命而王孔子曰太伯獨見王季獨知伯見父志季知父心故太王太伯王季可謂見始知終而能承志矣

古今樂錄太王卒太伯虞仲還奔喪哭于門外季歷謂太伯長當立垂涕留之終不肯止遂去吳是後季歷作哀慕之歌曰先王既徂長靈異都哀喪腹心未寫中懷追念伯仲我季如何梧桐萋萋生于道周宮館徘徊臺閣既除何爲遠去使此空虛支骨離別垂思南隅瞻望荆越涕淚交流伯兮仲兮逝肯來遊自非二人誰訴此憂

竹書紀年武乙三十四年周公季歷來朝王賜地三十

里玉十穀馬十匹三十五年周王季伐西落鬼戎文丁二年伐燕京之戎四年伐余無之戎克之周王季命爲殷牧師七年伐始呼之戎克之十一年伐翳徒之戎捷其三大夫王嘉季歷之功賜之圭瓚秬鬯九命爲伯旣而執諸塞庫季歷困而死

### 周書王季宅程

詩集傳名物鈔王季之薨當在帝乙七祀丙子之歲人表考王季泰伯少弟史周紀曰季歷亦曰公季作程邑文王遷焉壽百歲

竹書謂文丁殺季歷妄也

葬鄠縣南山在渦水之尾

### 生民



姜嫄

古今人表列上中作姜原

毛傳姜姓也后稷之母配高辛氏帝焉

韓詩章句姜姓嫄字

史記亦作姜原

說文嫄台國之女周棄母字也

陸德明曰姜姓嫄名有邰氏之女帝嚳元妃后稷母也  
正義曰晉語云炎帝以姜水成成而異德故炎帝爲姜  
是姜炎帝之姓姜嫄是炎帝後姓姜而以嫄配之知有  
女名嫄婦人不以名行此嫄或當是字但五帝時質未  
必有名字之別故以名言之大戴禮帝系篇帝嚳卜四  
妃之子皆有天下上妃有邰氏女曰姜嫄生后稷帝嚳  
聖夫姜嫄正妃配合生子人之常道婦人無外事不因

求子之祭而有出國之理禋祀以求子是祀禱也姜嫄隨帝之後踐履帝迹行事敬而敏疾故爲神歆饗河圖曰姜嫄履大人迹生后稷中候稷起云蒼耀稷生感迹苗興云契以卵生稷以迹乳是悉信亦非不信亦非斯干正義特牲少牢祭祀之禮皆以其妃配夫而食無特立廟之禮者姜嫄生后稷以配天爲周之王業則周之先妣特立廟者唯姜嫄耳

人表考姜原帝嚳妃生棄原本作嫄姜姓嫄名周之先妣墓在聞喜縣西北稷王山下冰池村

按鄭箋以帝爲上帝意主姜嫄非帝嚳之妃乃信識緯命歷序云少昊傳八世顓頊傳九世帝嚳傳十世

則堯非嚳子稷年又少于堯則姜嫄不得爲帝嚳之妃故云當堯之時爲高辛氏之世妃謂爲其後世子孫之妃也與大戴禮史記諸書皆不合不可信也

后稷

古今人表列上中作弃

史記周后稷名棄其母有邰氏女曰姜原姜原爲帝嚳元妃姜原出野見巨人迹踐之居期而生子以爲不祥棄之隘巷馬牛過者皆辟不踐徙置之林中適會山林多人遷之而棄渠中冰上飛鳥以其翼覆薦之姜原以爲神遂收養長之初欲棄之因名曰棄棄爲兒時屹如巨人之志其遊戲好種樹麻菽麻菽美及爲成人遂好耕農相地之宜宜穀者稼穡焉民皆法則之帝堯聞之

舉棄爲農師天下得其利有功帝舜封棄于郃號曰后稷別姓姬氏

正義曰王肅引馬融云姜嫄任身之月帝嚳崩崩後十月而后稷生蓋遺腹子也以爲遺腹子姜嫄避嫌而棄之王基駿之曰世本云帝嚳卜其四妃之子皆有天下若任身之月而帝嚳崩姜嫄尙未知有身帝嚳焉得知而卜之孫毓云天道徵祥古今有之皆依人道而有靈助巨迹之感何獨不然是言天異后稷于人帝又承天之意所以棄而異之明示天下安有遺腹寡居之事乎且馬王之說姜嫄爲高辛之正妃其于帝堯則君母也比之後世則太后也以太后之尊欲棄己子足以自專

堯爲兄聽母棄弟縱其安忍之心殘其聖父之允不慈  
不孝豈其若此王說進退多尤所言遺腹非毛旨矣  
春秋元命苞稷岐頤自求是謂好農蓋象角亢載土食  
穀

吳越春秋棄爲兒時好種樹禾黍桑麻五穀相五土之  
宜青赤黃黑陵水高下粢稷黍禾蘧麥豆稻各得其理  
堯遭洪水人民泛濫逐高而居堯聘棄使教民山居隨  
地造區研營樹之術三年餘行人無飢乏之色乃拜棄  
爲農師封之台

通鑑前編漢趙過曰后稷始耨田則耨隴之法自稷始  
也晉董氏曰辰以成善后稷是相則農時之節自稷始

也

左傳姑后稷元妃

帝王世紀后稷納姑氏生不窋

說文姑黃帝之後百鯁姓后稷妃家也

山海經后稷是播百穀稷之孫曰叔均始作牛耕 西

南黑水之閒有廣都之野后稷葬焉爰有膏菽膏稻膏

黍膏稷百穀自生冬夏播琴鸞鳥自歌鳳鳥自儷靈壽

實華草木所聚爰有百獸相羣爰處此草冬夏不死

后稷之葬山水環之在氏國西

詩集傳名物鈔史記以不窋爲后稷子而又缺辟方侯

牟雲都諸盤四世遂謂后稷至文王十五世且自夏歷

商凡四十五世而后稷至文王止十五世其亦誤矣子金子云案世本自不畱鞠公劉至季歷已十七世史記拘于十五王文始平之數謂后稷之子爲不畱曾孫爲公劉前旣缺代又自公非以後缺四世不書皇甫氏不得其說遂以四世爲字而組紃又自有四名獨索隱覺其非而不明辨路史已明辨而不斷十五王之說今案國語十五王蓋自公劉數至文王爾

人表考弃本作棄字度辰

本路史

堯使居稷官百穀稷首

種稷爲大官農官之君故號后稷周之太祖國于郃厥相披頤以癸巳日死于黑水之山葬黑水閒都廣之野按傳言夏衰不畱失官史遷皇甫謐俱以不畱爲后

稷子謬也路史稷生縶縶縶生叔均又閱數世而至不窋若以不窋棄之親子至文王千餘歲惟十五代實不合事情歐陽公洪容齋羅長源皆辯其非

### 公劉

公劉

古今人表列上中

鄭箋公劉者后稷之曾孫也

陸德明曰王肅云公號劉名也尙書傳云公爵劉名也王基云公劉字也

正義曰公劉是后稷曾孫后稷本封于邠非有所迫不應去國適豳公劉有道之君天子不應見逐知以夏之衰世始遷豳也鄭譜以公劉當太康時韋昭注國語以



不宙當太康時不宙乃公劉祖不應共當一世夏氏之  
衰太康爲始計不宙宜當太康公劉應在其後太康之  
後有羿浞之亂比至少康之立幾將百年蓋太康始衰  
之時不宙失官少康未立之前而公劉見逐也公劉是  
名是字王基謂周人以諱事神王者祫百世召公大賢  
出自姬姓稱揚先祖盛德之君而舉其名不亦遠于禮  
乎其意以爲公劉必是字也虞夏之時世代尙質以之  
爲名未必非矣

通鑑前編不宙生鞠鞠生公劉始遷于邠周家稱公自  
公劉始

史記公劉復修后稷之業務耕種行地宜自漆沮度渭

取材用行者有資居者有畜積民賴其慶百姓懷之多徙而保歸焉周道之興自此始

漢書周之先自后稷堯封之邵積德累善十餘世公劉避桀居豳

吳越春秋公劉慈仁行不履生草運車以避葭葦公劉于戎變易風俗民化其政

民勞

厲王

小序

古今人表列下下作厲王胡

厲王名胡夷王之子在位三十七年諡法致戮無辜曰厲

鄭箋厲王成王七世孫也

國語厲王說榮夷公芮良夫曰榮公好專利而不知大難若用周必敗既榮公爲卿士諸侯不享王流于彘史記厲王卽位三十年好利近榮夷公大夫芮良夫諫厲王不聽卒以榮公爲卿士用事王行暴虐侈傲國人謗王王使監謗者以告則殺之其謗鮮矣諸侯不朝三十四年王益嚴于是國莫敢出言三年乃相與畔襲厲王厲王出奔于彘太子靜匿召公之家

呂氏春秋共伯和修其行好賢仁而海內皆以來爲稽矣周厲之難天子曠絕而天下皆來請矣魯連子衛州共城縣本周共伯之國也共伯名和好行仁義諸侯賢之周厲王無道國人作難王奔于彘諸侯

奉和以行天子事號曰共和元年厲王死于彘  
共伯使諸侯奉王子靖爲宣王共伯復歸國于衛

世本古義厲王之難天子曠絕諸侯知共伯賢請立爲  
天子共伯不聽弗獲免遂卽位一十四年天下大旱舍  
屋焚卜于太陽兆曰厲王爲祟召公乃立宣王共伯歸  
還于宗逍遙得意于共邱山之首莊子及呂氏春秋魯  
連子皆言共伯得志于邱首卽其人也向秀郭象援古  
之說以爲共和者周王之孫懷道抱德食封于共共今  
謂之共城故漢之共縣

人表考厲王魯語單稱厲以戾虐流彘死葬晉州霍邑  
縣東二十九里 案厲王之年據本紀是三十七年奔

堯五十一年崩外紀通志謂在位四十年通共和五十四年竹書作十二年奔堯二十六年陟未定孰是

版

凡伯小序

鄭箋凡伯周同姓周公之允也入爲王卿士

公羊傳凡伯者何天子之大夫也

正義曰僖二十四年左傳云凡蔣邢茅胙祭周公之允也以其伯爵故宜爲卿士春秋隱七年天王使凡伯來聘世在王朝蓋畿內之國杜預云汲郡共縣東南有凡城共縣于漢屬河內郡蓋在周東都之畿內也

詩補傳凡伯乃周同姓之世卿故至厲王時猶膺伯爵

按節南山疏謂瞻卬箋引隱七年天王使凡伯來聘  
自隱七年上距幽王之卒五十六歲凡國伯爵爲君  
皆然不知其人之同異但版與瞻卬俱是凡伯所作  
版已言老夫灌灌匪我言耄則不得下及幽王時矣  
逸齋于瞻卬詩亦云凡伯爲版之詩以刺厲王有曰  
老夫灌灌匪我言耄已非少壯矣歷年旣久又刺幽  
大壞則非版之凡伯明矣凡爲周同姓之國豈非入  
爲卿士與瞻卬召閔二詩蓋版之凡伯子若孫也然  
則凡伯世守爵邑一進諫于厲王至其子孫復進諫  
于幽王閱數傳俱克盡規切之義不媿周公之裔矣

桑柔

芮伯

小序

古今人表列

上下作

芮良夫

鄭箋芮伯畿內諸侯王卿士也字良夫

陸德明曰芮國名

竹書紀年芮伯周大夫也

顏師古曰芮伯周司徒也

正義曰書序云巢伯來朝芮伯作旅巢命武王時也顧  
命同召六卿芮伯在焉成王時也桓九年王使虢仲芮  
伯伐曲沃桓王時也此又厲王之時世在王朝常爲卿  
士故知是畿內諸侯爲王卿士也書敘注云芮伯周同  
姓國在畿內則芮伯姬姓也杜預云芮國在馮翊臨晉  
縣則在西都之畿內也

按詩序謂芮伯刺厲王而作桑柔周書稱芮伯稽古  
作訓納王于善暨執政小臣咸省厥躬作芮良夫國  
語又述芮良夫諫厲王用榮夷公不聽則芮良夫不  
愧爲忠直之臣惜乎厲王不能用卒致流彘之禍也  
雲漢

仍叔

小序

鄭箋仍叔周大夫也春秋桓五年夏天王使仍叔之子  
來聘

正義曰仍氏叔字春秋之例天子公卿稱爵大夫則稱  
字此言仍叔故知大夫也桓五年夏天王使仍叔之子  
來聘證此仍叔是天子大夫也



詩補傳仍叔亦周之世臣也春秋書仍叔之子來聘乃  
周威王之十三年去宣王卽位之初已百餘年左氏云  
仍叔之子弱蓋未滿二十也故杜預云譏使童子出聘  
以歲考之殆其曾孫與

按節南山疏云箋引桓五年仍叔之子來聘春秋時  
趙氏世稱孟智氏世稱伯仍氏或亦世字叔也自桓  
五年上距宣王之卒七十六歲若當初年則百二十  
年矣引之以證仍叔是周大夫耳未必是一人也春  
秋桓王使仍叔之子來聘穀梁仍作任公羊亦作任  
叔譏其父老子代從政仍叔雖已年老然考宣王遇  
早前編在六年大紀連年書早則雲漢之詩作于宣

王六年矣宣王在位四十六年歷幽王十一年平王五十一年至桓王十三年已百十五年仍叔已能作詩美王年應長矣斷未有至桓王時尙存而年老逾百三四十歲者則此非春秋所書之仍叔明矣蓋仍氏叔字世爲大夫後嗣相襲是其常也

崧高

申甫

毛傳堯之時姜氏爲四伯掌四嶽之祀述諸侯之職于周則有甫有申有齊有許也

鄭箋申申伯也甫甫侯也甫侯相穆王訓夏贖刑

正義曰申甫並指其人不指其國申伯甫侯入爲卿士

詩氏族考卷第五

三

別下齋校本

也周語堯使禹治水四岳佐之帝嘉禹德賜姓曰姒氏  
曰有夏祚四岳國爲侯伯氏曰有呂周語唯云四岳不  
言名字鄭語云伯夷能禮于神以佐堯者也掌禮之官  
總主諸神故掌四岳之祀德當神意山神祐之降生申  
甫而福與其子孫史記齊世家太公望其先祖嘗爲四  
岳佐禹有功虞夏之際封于呂或封于申尙書作呂刑  
孔安國云呂侯後爲甫侯詩及禮記作甫尙書與外傳  
作呂孔子閒居引此詩注以甫爲仲山甫案外傳稱樊  
仲山甫則是樊國之君必不得與申伯同爲岳神所生  
困學紀聞禮記孔子閒居注云周道將興五嶽爲之生  
賢輔佐仲山甫及申伯爲周之幹臣愚謂仲山甫猶儀

禮所謂伯某甫也周語云樊仲山父蓋甫與父同若以仲山甫爲甫則尹吉甫蹶父皇父程伯休父亦可以言甫矣近世說詩者乃取此而舍箋傳愛奇之過也

詩補傳言生甫及申謂生山甫及申伯也說者泥唐虞之時姜氏掌四岳之祀之說以爲神祐其子孫在周有齊許申甫遂以甫爲穆王之甫侯申爲宣王之申伯夫遠取穆王之臣以配申伯已非人情而謂神專祐掌祀者之子孫抑又近誣詩人或兼言姓名或止言其字或言國而不及名或言名而不及姓今吉甫于申伯言其國于山甫言其字皆有義例近舍山甫而遠取甫侯理不可信

詩緝申伯光輔中興而遠取周道始衰之甫侯以匹之非所以褒揚申伯也

世本古義就詩文證之惟仲山甫吉甫字俱作甫而其餘蹶父皇父休父皆是父非甫何虞其混若吉甫既爲作詩之人必無自讚之理而烝民之詩美仲山甫篇中亦明著爲吉甫所作此詩以申甫並言乃統爲二詩發端亦可見甫之爲仲山甫斷無疑也

按逸齋補傳嚴氏詩緝辨甫非甫侯說甚直捷若孔氏穎達王氏應麟則未免曲護箋說

申伯

古今人表列上下

鄭箋申伯以賢入爲周之卿士佐王有功

正義曰申伯先封于申來仕王朝今命爲州牧故改邑于謝

左隱元年正義申出伯夷姜姓國語齊許申呂由大姜言由大姜得封在周興之初其後中絕至宣王時申伯以王舅改邑于謝

李樗曰史記周本紀云申侯與西戎共攻幽王則是申者乃侯爵也以其爲方伯故謂申伯亦猶召公稱公而謂之伯也

詩緝方伯者一方之牧也

世本古義申伯之國而稱王舅按說文母之兄弟爲舅妻之父爲外舅申伯稱王舅疑是后父漢書外戚恩澤

侯表云其餘后父據春秋褒紀之義帝舅緣大雅申伯之意寔廣博矣又以列女傳證之宣后稱姜后申固姜姓而後章有申伯番番之語番番者老也此非后父而何

烝民

仲山甫

古今人表列上下作中山父

毛傳仲山甫樊侯也

正義曰仲山甫是樊國之君爵爲侯而字仲山甫也周語稱樊仲山甫諫宣王韋昭云食采于樊僖二十五年左傳晉文公納定襄王王賜之樊邑則樊在東都畿內杜預云經傳不見畿內之國稱侯男者天子不以此爵

賜畿內也如畿內本無侯爵傳言樊侯不知何據  
漢書杜欽傳仲山甫異姓之臣就封于齊

困學紀聞自注權德輿集云魯獻公仲子曰山甫入輔  
周食采于樊

詩補傳史記周宣王時有樊穆仲韋昭云穆仲仲山甫  
之諡

仲山甫鼎銘仲山甫鼎其萬年子子孫孫永寶用  
人表考周語注仲山父食采于樊諡穆故曰樊仲山父  
亦曰樊穆仲葬成陽城西堯陵北

按晉語王賜文公陽樊之田陽人不服公圍之將殘  
其民倉葛呼曰陽有夏商之嗣典有周室之師旅樊



仲之官守焉樊仲卽仲山甫也

韓奕

韓侯

古今人表列上下

毛傳韓侯之先祖武王之子也

鄭箋韓姬姓之國也韓侯先祖有功德者受先王之命封爲韓侯居韓城

正義曰桓三年左傳曲沃武公伐翼韓萬御戎服虔云韓萬晉大夫曲沃桓叔之子晉爲大夫以韓爲氏襄昭之間有韓宣子六國之韓王是此韓爲之後也宣王之時韓爲侯伯武公之世萬已受之蓋晉文侯輔平王爲方伯之時滅之也韋昭云宣王時命韓侯爲侯伯其後

爲晉所滅以爲邑以賜桓叔之子萬是爲韓萬則其亡在平王時也

詩補傳韓非六國之韓乃武王之後左氏傳所謂邲晉應韓也

### 顯父

毛傳顯父有顯德者也

鄭箋顯父周之公卿也

正義曰父者丈夫之稱以有顯德故稱顯父

### 汾王

毛傳汾大也

鄭箋汾王厲王也厲王流于錕鍓在汾水之上故時人

因以號之猶言莒郊公黎比公也

正義曰釋詁云墳大也傳以墳汾音同故亦爲大也王肅云大王王之尊稱也箋作汾水之汾不得訓之爲大且作者當舉其實故以爲厲王在汾因號厲王爲汾王以所居之地號之也左傳于昭公之世有莒郊公襄公之世有黎比公莒在東夷不爲君謚每世皆以地號公此外猶有茲丕公著邱公之等

詩補傳厲王流于彘在汾水之上故以爲汾王猶晉侯居翼謂之翼侯晉人納諸鄂謂之鄂侯鄭叔段居京謂之京城太叔及出奔共謂之共叔也又楚人謂王不終者爲敖葬邲者曰邲敖葬訾者曰訾敖其汾王之類乎

說者以莒郊公黎比公爲比非也案左氏傳莒夷無諡于是有黎比公莒郊公茲丕公著邱公皆以號爲稱與汾王以地爲稱不類

蹶父

毛傳蹶父卿士也

正義曰蹶氏父字不書國爵則非諸侯下言靡國不到則是爲王聘使之人故知卿士也  
詩補傳蹶父卿士姑姓也

春秋地名攷略蹶父疑南燕之君入爲卿士者

按黃帝之枝裔曰伯儵蹶父其後也國語云黃帝之子二十五宗其得姓者十四人爲十二姓姬酉祁巳

言上卷之三  
三  
滕藏任荀僖姑嬖依是也故蹶父之先受姓姑也焦  
氏易林引此作大夫祈父不知何據

韓姑

毛傳姑蹶父姓也

鄭箋蹶父甚武健爲其女韓侯夫人姑氏視其所居韓  
國最樂

正義曰婦人稱姓今以姓配夫之國謂之韓姑故知姑  
是蹶父之姓也

世本古義韓姑按路史國名記姑姓一十四國南燕伯  
儵國卽后稷妃家亦曰東燕及左昭三年北燕伯欵亦  
姑姓末章言燕師所完疑蹶父國本在燕而仕于王朝

因與韓侯聯姻故敘及其先世之事

江漢

召虎

古今人表列上下

毛傳召虎召穆公也

鄭箋召公召穆公也名虎

正義曰經言召公皆召康公也嫌此亦爲康公故辨之  
經云王命召虎是名虎也世本穆公是康公之十六世  
孫

詩補傳召康公當成王時陳三詩以自獻其言類臯陶  
賡歌不忘警戒宜裔孫穆公有乃祖風烈厲王之世雖  
不見信用屢陳規諫傳記所載謂厲王暴虐侈傲國人

謗王穆公曰民不堪命王怒使人監謗穆公曰防民之口甚于防川王旣不能聽其後奔彘太子靜匿穆公之家國人圍之穆公曰吾驟諫王不從以及此難今殺太子王其以我爲怨懟乎乃以其子代之脫太子晚事宣王立江漢之功穆公之賢其始終大略如此

郡國志注雍召穆公采邑

按竹書召穆公與周定公立宣王小序宣王命召公平淮夷王肅曰召公爲司空主繕治其勤勞克繼康公之業民勞疏引左傳服虔注云穆公召康公十六世孫史記但云召公以下九世至惠侯而不著其年謚謂惠侯當厲王奔彘之時下至十五世則爲繆侯

七年爲魯隱公元年與疏不合

常武

尹氏

毛傳尹氏掌命卿士

鄭箋尹氏天子世大夫也

正義曰尹氏掌命卿士卽內史也凡命諸侯及孤卿大夫則策命之此時尹氏當是尹吉甫吉甫卿士而云大夫者以命臣內史之事周禮內史中大夫故以大夫言之吉甫卿士而掌命臣者蓋爲卿而兼內史也

程伯休父

古今人表列上下

毛傳程伯休父始命爲大司馬



詩地理考氏族略重爲火正裔孫封于程

應劭曰封爲程國伯休甫字也

正義曰王使內史大夫尹氏爲策書命此程國之伯字  
休父者謂命爲大司馬之卿也大司馬職云若大師則  
掌其戒令此言戒我師旅是司馬之事又楚語云重黎  
氏世敘天地其在周程伯休父其後也當宣王時失其  
官守而爲司馬氏韋昭云程國伯爵休父名也失官謂  
失天地之官而以諸侯爲大司馬也案父宜是字而昭  
以爲名未能審之

詩疏義濮氏曰程畿內邑在豐

世本古義案路史和實爲黎後爲和氏商封之程羅萃

云或謂風姓有裔孫程伯始啟土失之子華子云昔吾之宗君爲周日正周公作成周定鼎于郊鄩修和周郊于是吾之宗君薦其所以爲祥者其族有三曰井里之璞也曰太山之器車也曰唐叔里畝之禾也王命分寶玉于魯公歸禾于周公作歸禾吾之宗君始有蒲璧以朝作程典令其顯榮書在故府迨宣王之時吾之宗君入董六師爲王虎臣是曰司馬司馬之後凡九世而其子孫或播居于汾河之間十有一世而國并于溫程伊川撰明道先生行狀云程氏之先曰喬伯爲周大司馬封于程子孫遂以氏按喬伯休父當是一人喬名而休字豈亦取喬木休息之意與郡國志云雒陽有上程聚

古程伯休父之國也文王居程故此加爲上程又楚語謂程伯休父當宣王時爲司馬氏韋昭謂以諸侯爲大司馬按司馬遷敘傳自述爲休父之後則休父之爲司馬明矣

詩氏族考卷第五